

01 AUG 1998

Bola Sepak-Remaja (Malaysia/Laos)

MALAYSIA MELEPASI HALANGAN PERTAMA APABILA MENEWASKAN LAOS 4-0

JOHOR BAHRU, 1 Ogos (Bernama) -- Malaysia melepasi halangan pertama apabila mencipta kemenangan 4-0 ke atas Laos dalam perlawanan pusingan kelayakan kejohanan Bola Sepak Remaja Asia Bawah 19 Tahun di Stadium Larkin malam ini.

Pasukan tuan rumah mempamerkan permainan menarik terutama dalam separuh masa kedua yang menyaksikan mereka menghasilkan tiga gol mudah.

Corak permainan separuh masa pertama adalah seimbang tetapi Malaysia memiliki kelebihan dengan asakan merbahaya sehingga memaksa pasukan pelawat itu bekerja keras untuk memperkemas pertahanan mereka.

Peluang Malaysia untuk membolosi kubu lawan dipersiapkan oleh ketidakberkesanan kombinasi penyerang Akmal Rizal Ahmad Rakhli dan Hairuddin Omar.

Laos juga mempunyai kesempatan untuk membolosi pasukan tuan rumah pada awal minit permainan melalui usaha keras Soubinh Keopphet dan Kholadeth Phonphachanh tetapi peluang yang mengundang itu gagal disempurnakan dengan sebaikmungkin.

Gol yang dicari-cari sepanjang separuh masa pertama akhirnya diperolehi pada minit ke-35. Gol tersebut bermula daripada gerak Jaafar Salleh yang membuat hantaran silang kepada Akmal Rizal tetapi sepakan pemain pertahanan Phonphachanh dalam usahanya untuk menyelamatkan keadaan menyaksikan bola masuk ke gawang sendiri.

Separuh masa kedua Malaysia mempamerkan permainan yang lebih matang dan lebih banyak menggunakan pemain sayak untuk melancarkan serangan yang menyaksikan mereka memperolehi gol kedua pada minit ke-69.

Bermula daripada gerakan barisan pertahanan, Faziallah Mamat meloloskan dirinya ke sudut sebelah kanan sebelum membuat hantaran kepada Hairuddin yang menyepak kemas ke sasaran sekaligus menewaskan Somlith Pophannouvone.

Malaysia hampir menambahkan jaringan seminit kemudian tetapi sepakan Akmal Rizal melewati palang gol walaupun hanya berdepan dengan penjaga gol.

Bagaimanapun kesilapan yang dilakukan oleh Akmal ditebus pada minit ke-82 apabila menjaringkan gol ketiga hasil tendangan sudut dan Mahathir Mohd Jamal melengkapkan jaringan 4-0 pada masa kecederaan.

Malaysia akan bertemu Singapura dalam perlawanan kedua Isnin depan sementara Laos akan berdepan dengan China.

MALAYSIA: Kamarulzaman Hassan, Faziallah Mamat, Mohd Nidzam Jamil, S.Jayaprakash, R.Nantha Kumar, Rafiz Abu Bakar (Mahathir Jamal), Mohd Shawal Johari (Mohamed Helmi, Akmal Rizal Ahmad Rakhli, Hairuddin Omar, Jaafar Salleh (Eddy Helmi Manan), Kamarulzaman Yub Abdul Majid.

LAOS: Somlith Pophannouvone, Maykhen Lorvanekham, Thanongsine Souryamath, Ananh Thepsouvanh, Souvanno Luang A Math (Santiphap Phokhasomboun), Vilasith Sunakeovongsa (Bouvong Vannabouathone), Soubinh Keopphet, Kholadeth Phonphachanh, Sittiphong Sayamongkhounh, Phonesavanh Phimmasean, Khamsavanh Khotsay (Khempheth Sengphanith).

-- BERNAMA

MKO AHA